

醫門補要卷中

丹徒趙濂竹泉著

鼻淵

腦戶久為濕熱上蒸外被風寒裹束鼻通於腦氣亦壅塞
時有腥膿滲下如釜底常有薪炊則釜中自生變味氣水
涓涓而滴名曰鼻淵乃肺腦實火以清肺飲

方見後

引加

猪胆汁一個冲服胆可通腦以有情入無情轉能制病十

數服自效

下疳宜食淡味



北京中醫藥大學圖書館 版權所有

患下疳與鼓脹病皆忌鹽醬因鹹味斂濕助火凝痰使外
症腫痛腐爛然食淡味人易衰軟以秋石充鹽爲食最安

肺熱極便爛臭

表邪遏伏於肺失於宣散并嗜烟酒火毒上薰久鬱熱熾
爍腐肺葉則出穢氣如臭蛋逼人雖延遷終不治

膿氣味如臭蛋

癰疽成膿日久未經開放愈釀則熱愈盛熱愈盛則蒸灼
腐肉變味愈熱愈熟必穿決而膿出其氣臭過於臭蛋在
四肢總拖連難斂在身體者難治



腎氣遊風

脾腎兩虛氣血錯亂濕邪內擾每臨暑濕之令外濕激動

內濕使足脛皮膚紅腫墜痛為腎氣遊風用鍼刺濕水將

黃柏末
豆腐和敷內服防己湯 方見後

赤白遊風

表虛風入兼血熱皮燥致皮膚搔落白瘡或生水窠或有

黃白靨遊走不定 赤者名赤遊風
白者名白遊風治不易效久進祛風丸

可退 方見後

狗咬毒易走散



常犬咬破皮肉卽上戍毒丹貼膏藥

方見青囊集

四五日

可愈倘不速治及不戒口其毒易散紅腫焮痛爛深洶膿
在上身者按癰腫治法在膝蓋下者先提毒三日再按臙
瘡治法若瘋犬咬者治法

見青囊集

辨痧疹腹痛

小兒痧疹熱毒未達伏於腸胃常悠悠腹痛頭與胸腹皆
發熱或全不發熱其身腹有紅紫塊點或隱或現脉浮數
宜疎散其表如誤以煖藥入腹不救若虬犯中胃作痛痛
行止息尺脉沉滑忽大忽小若寒邪腹痛脉沉遲此二症

皆不發熱

頭面頸項外症不可鍼灸

頭面頸項生瘍乃風熱上壅居多頭又諸陽所會誤用鍼

灸似救火沃油遂漫腫難挽至肉桂麝香温煖膏藥尤不可貼

亦助火為腫可畏

粗筋多處忌鍼

勞苦之輩腿足多有粗筋盤曲則筋內即血管或濕氣盛與血分過熱者雖發外瘍誤用刀鍼恐血淌不止無救

外症忌食燕窩



燕窩是海燕啣小魚粘於石上而成藉燕口含之元氣清
補肺陰乃海味發物若外症誤食補塞毛孔毒遂內陷不
出串腫潰爛不可收拾也

濕脚氣 又名腎臟風

肺司皮毛脾主肌肉二臟虛損濕邪留連化熱下注熱甚
則皮赤而發熱濕甚則腫胖而惡寒多在盛夏陽氣發揚
濕暑流布生於虛體安逸之輩若足脛先腫而后痛是血
傷氣名濕脚氣或先足灣一點紅腫或自足指與足脛先
起而后串腫一腿或串及兩腿脛者七日可退若脚氣上



冲乃水來凌火則嘔吐不止喘急不休者逆也以當歸拈痛湯

方見後

乾脚氣

足脛不腫而痛蹇縮枯細乃熱甚傷血為乾脚氣宜涼血

清燥湯

方見後

外瘍腐肉脫時凶象

外症脫腐之時膿血去多正氣難支患底肉如灰色全無生氣或患上驟變乾枯無膿四邊皮色焮紅起暈鎖住患口或鍼刺刀割并不知痛口渴唇燥心神慌張形色呆板



脉象弦硬皆胃氣敗絕血枯肉死無根浮火外泄陰陽兩
離殆四五日之命

腰痛日久成龜背痰

脾腎兩虧加之勞力過度損傷筋骨使腰膝隱痛惡寒發
熱食少形瘦背脊骨中凸腫如梅初不在意漸至背偃頸
縮蓋腎衰則骨痿脾損則肉削但龜背痰已成愈者甚寡
縱保得命遂爲廢人宜久服補腎湯

方見後

吸洋烟人病難復元

吸鴉片者氣血日被烟火薰耗腎水漸枯脾陽不振所以



食少肉削皮焦神憊遇病卽昏迨病已退多軟弱難起色
要靜心培養倘性躁欲速痊恐有不能

脇肋生核

肝氣鬱結并虛體勞苦太過者脇肋生核遇勞動腫硬尤
甚或潰流清水堅腫依然若此末有不成癆者

痔瘡

濕熱下注大腸從肛門先發小疙瘩漸大潰膿內通大腸
日久難斂或愈月餘又潰每見由此成癆者乘初起服清
熱內消散方見後數帖可愈若先咳嗽而成漏者不治

孕婦病須保胎

孕婦病忌熱藥須應用方中入清熱順胎步步保護若熱甚險傷胎已墮下多分不救

血瘀格食

噎格日久格拒飲食不納則胃之上口或有瘀血攔截滴水不進或吐紫血塊二三口者或吐鮮血杯許立刻亡者或數日後方死者或延弱極而死者

上格

憂悶傷肝致帝丁兩旁凸起紫筋數条束緊咽喉似物撐



塞吐不出嚙不下名為上格用長披刀刺斷其筋內投平

肝散

方見後
自鬆

再動肝氣必發

糞毒致病

田園種植必以糞為滋培每交三夏烈日炎威所照蒸起
地中濕毒則農作之男婦手足易染其毒始癢痛赤腫隨
吊爛用蒜頭青松果
甘蔗葛芭皮煎洗數次可愈倘以染毒手指拈食
物入口則毒易染物犯肺必發喘咳治不能效

濕水歸腎囊

脾虛不能制水則水下聚於腎溢於子囊腫大亮如水晶



將細鐵鍼眼穿頭髮一根在囊總筋兩邊順下流勢處各
穿通髮一鍼將鍼過孔口各留髮兩段在外拖掛使鍼孔
不閉則水自易流盡內宜服溫補利水方

眼腫難睜

眼目腫閉熱毒內灼生翳爛珠用竹片二條長與眼齊寬
二分許先以綿線扎緊竹片一頭卽將竹片夾住眼上胞
內眥又以長線扎緊竹片外端留線拴於耳上則眼可睜
以洩火氣腫痛可退數日後所夾之內腐脫無妨

取牙宜慎



牙齒痛久其根雖極動搖內有血筋縮束若草率動手取
落傷動血筋則血湧出不止有性命之憂投犀角地黃湯
方見後
如不止者加 西洋參二錢

多骨症

骨槽風與牙疔初起食葷腥必助火閉毒堅腫串潰連及
面頸牙關緊閉最為延遷每成多骨待多骨結聚拔去之
凡外瘍不戒葷鮮患口難斂則膿凝結於內日久堅硬遂
為多骨

疔症復腫



疔瘡方愈遂食葷腥患處新肉薄嫩未堅每復焮腫潰穿膿水否則患頂生腐肉如釘硬治難除根

瘋犬咬

瘋犬與蛇咬傷口愈後多麻木不仁若咬毒復發渾身尤麻癢亂串至心則死瘋犬初咬時頭頂有紅頭髮三根以燈火照之拔去紅髮則不發忌發物麻味籬聲

不敬鬼神致病

凡有褻嫚神祇或染邪祟或前身冤孽來纏其發內症神昏煩亂乍發熱乍不發熱夜間專言鬼神事身重串痛不



能轉動眼科少寐若生搭背對口流注止漫腫或硬堅不
見根盤痛無休息潰流血水刀鍼深刺不疼患者後須積
善早為懺悔或焚冥鏹自可挽救孔聖云敬鬼神而遠之
是當虔誠以盡禮非可諂瀆以邀福也

眼疾食葷生翳

暴患眼疾皆受風邪蘊而化熱上擾清竅若食肉味助火
生痰壅滯邪路風乘火威消耗目中膏脂或起白膜紅絲
或胬肉牽攀使目無全光或至失明先服决明消翳散數
帖後繼服羚羊角湯

二方見後

久患目疾不在此論



胃絕舌鑑

男女大小諸症數日間舌底滑潤舌面罩滿薑黃色
便時下蛭虫此胃土欲絕蟲無所附乘便時而出土
色舌因土之敗氣上衝故黃四五日當亡

肌肉如鐵

胸腹串痛按之有跳躍之處肌肉似鐵石鍼刺不得入此
真氣已竭血不流行則肌肉呆板速死之象

足底僵疔

足底初有一點頂痛漸若堅石日久亦或化膿或五六月



或一二年行走頂疼按之僵硬似鐵從旁邊以刀刺開或以火鍼當頂烙之挿降藥条拔去老根收功後忌葷腥兩月以免復發醫書未載此症

時感忌貼溫竄膏藥

時疫病渾身每有腫痛處煖性膏藥貼之雖用於外亦能引動內火劫陰助陽致肢體色紫膚冷脉伏神脫氣喘不旋踵而危者

乳不浮腫

向來體虛再加勞動太過真氣多爲不足每乳下浮腫如